

«Mes giavisch fiss ch'i dess Giuvens Verds en il Grischun»

Inscuntrada cun ina giuvna politicra e studenta

DA CLAUDIA CADRUVI / ANR

■ **Nesa Zimmermann è co-presidenta dals Giuvens Verds da la Svizra. Ella emprenda sursilvan a Friburg, perquai ch'insatge ha adina mancà en sia vita.**

Ina notizia a l'ur d'ina gasetta da la dumengia: «*Nesa Zimmermann e Martin Neukom* presideschan ensemen ils Giuvens Verds.» Nesa? Quai è bain in prenum rumantsch? L'anr inscuntra la giuvna politicra e studenta.

Malgrà ch'ella è creschida si a Turitg sa senta ella da chasa en il Grischun e discurre perfin dialect da Cuira. «Sch'jau vegn tar noss mises a Trin u sch'jau arriv cun auto da posta en Val Müstair e mes enconuschents ma retschaivan a la fermada ed ils uffants seglian enturn mai, lura ma sent jau da chasa.»

Ina segunda famiglia en Val Müstair

Nesa è naschida avant ventg onns a Turitg. Sia mamma – burgaisa da Trin e creschida si a Cuira – n'ha sezza betg emprendì rumantsch e n'ha pia era betg pudì dar vinavant la lingua dals antenats a la figlia. Linguas hajan adina plaschì ad ella, raquinta Zimmermann. Gia en scola primara haja ella cumenzà ad imprendere talian. Betg perquai che talian avess plaschì aparti bain, igl è simplamain stà la suletta lingua estra ch'ins ha purschì. Las vacanze da stad e d'enviern haja ella savens passentà en il Grischun. Cun 15 onns haja ella visità la Val Müstair ensemen cun sia mamma. «Nus avain vuli vegnir a savair, co che mia onda, ch'era morta cura ch'jau avev tschintg onns, aveva vivì ils ultims onns en questa Val», raquinta Nesa. Ellas han emprendì d'enconuscher ils amis ed enconuschents da pli baud da sia onda.



Nesa Zimmermann sa senta da chasa a Trin e Valchava, era sch'ella n'ha mai abità en il Grischun. FOTO C. CADRUVI

«Quella glied è daventada mia segunda famiglia ed jau sun adina puspè turnada la stad a far fain.»

Cumenzà cun vallader

«Jau hai svelt senti che la glied a Valchava discurreva pervi da mai tudestg. Cun ils uffants na pudev'jau gnanca discurre», raquinta Zimmermann. Perquai haja ella cumenzà ad imprendere vallader. Ma d'emprender tut persula ina lingua saja stentus e cun il temp haja ella dà si. Pli tard, cun la lavur da matura, ha ella vuli far ina segunda emprova. Ella avess vuli imprendere rumantsch e scriver sur-

lunder. Ma il scolast ha giavischà ina lavur pli scientifica. Igl è stà curt avant ch'ins ha introducì il rumantsch grischun en las emprimas scolas. Zimmermann è sa dumandada: «Tge pensan ils scolars insumma da la nova lingua da scrittira?» Ella ha concepì in questunari per interrogar scolars dal stgalim aut en Val Müstair e scolars rumantschs da la scola chantunala. Radund 150 scolars han dà resposta. En Val Müstair han ils scolars esprimì pouca simpatia per il rumantsch grischun. A Cuira, nua ch'ils scolars avevan g' singulas lecziuns, è il resun stà pli positiv en il senn da: Il ru-

mantsch grischun saja ina via raschunavla.

In onn pli tard ha Zimmermann redigì sia lavur da matura ed ha inoltrà ella per ina concorrenza da «Scienza e giuventetgna/Schweizer Jugend forscht».

Cuntinuà cun sursilvan

Dapi tschintg semesters studegia Zimmermann a Neuchâtel giurispudenza. Quest semester ha ella cumenzà in curs da sursilvan tar *Renzo Caduff* a l'Universitad da Friburg. Els sajan ina classa da var diesch students, raquinta Zimmermann. Intgins fetschian il curs plitost per rimnar puncts. Ma i haja trais u quatter students sco ella che hajan parents u auters lioms cun il Grischun. Senza il rumantsch manchia simplamain insatge, constatescha Zimmermann. Quai sentiment hajan exprimì anc auters scolars cun lioms.

En sasez avess ella pli gugent emprendì vallader per pudair baterlar cun ils enconuschents a Valchava. Ma per il moment na dettia quai nagin curs ladin e sursilvan saja er en urden, pertge sia famiglia deriva gea da la Surselva. Era la mamma da Nesa ha cumenzà avant intgins onns ad imprendere sursilvan a la Scol'auta populara a Turitg.

In giavisch politic?

En Romandia ha la studenta cumenzà a s'engaschar l'emprim tar Greenpeace. Ma ella ha svelt remartgà ch'i na basta betg da s'engaschar mo per la natira. Per chattar soluziuns dovri era la politica, uschia ch'ella è entrada en la suprastanza dals Giuvens Verds a Neuchâtel. «Tar nus po mintgin fa part da la discussiun.»

Ils Giuvens Verds vulan mantegnair la natira sco basa da vita per las genera-

ziuns vegnentas. Perquai promovon els in stil da viver che sa cumporta cun l'ambient. I dettia mintgatant collegas che dumondian sch'ella na saja betg frustrada da cuntanscher mo pauc cun tant engaschament politic. «Mia resposta è adina: Quai m'è tuttina. Jau emprov da m'engaschar e da far mes pussaivel. Pertge jau sun persuadida che nus avain quasi ina obligaziun – ed a medem temp la schanza – da prender enta maun e da furmar noss futur.»

La suprastanza dals Giuvens Verds da la Svizra n'aveva fin da curt nagin presidi. Ins na vulevia avair naginas ierarchias. Ma cun il temp hajan ins remartgà ch'i saja bun d'avair in president per communitgar cun ils meds da massa e per il contact cun las autras partidas giuvnas. Uss partian ils Giuvens Verds il presidi sin duas persunas ed hajan fatg bunas experientschas.

E sch'ina d'iala vegness e dumandass tge giavisch politic che la co-presidenta dals Giuvens Verds da la Svizra avess? Tge fiss lura la resposta? Zimmermann na targlian gnanca secunda: «Jau giavischass ch'i dess ina secziun dals Giuvens Verds en il Grischun.»

Curt e bun

Naschida: ils 11 d'avust 1989
Abitescha: a Neuchâtel
Colur preferida: cotschen
Spaisas preferidas: pulenta u capuns
Musica: Vivaldi e Liricas Anals
Autor: Gabriel Garcia Marquez
Lieu preferì: Lai da Cresta
«Auto» preferì: il tren